

全唐诗卷七百三十九

卷 739_1

【中酒寄刘行军】李建勋

甚矣频频醉，神昏体亦虚。
肺伤徒问药，发落不盈梳。
恋寝嫌明室，修生愧道书。
西峰老僧语，相劝合何如。

卷 739_2

【白雁】李建勋

东溪一白雁，毛羽何皎洁。
薄暮浴清波，斜阳共明灭。
差池失群久，幽独依人切。
旅食赖菰蒲，单栖怯霜雪。
边风昨夜起，顾影空哀咽。
不及墙上乌，相将绕双阙。

卷 739_3

【早春寄怀】李建勋

家山归未得，又是看春过。
老觉光阴速，闲悲世路多。
风和吹岸柳，雪尽见庭莎。
欲向东溪醉，狂眠一放歌。



卷 739_4

【春日东山正堂作】李建勋

身闲赢得出，天气渐暄和。
蜀马登山稳，南朝古寺多。
早花微弄色，新酒欲生波。
从此唯行乐，闲愁奈我何。

卷 739_5

【春日小园晨看兼招同舍】李建勋

最有杏花繁，枝枝若手抟。
须知一春促，莫厌百回看。
鸟啭风潜息，蜂迟露未干。
可容排饮否，兼折赠头冠。

卷 739_6

【惜花寄孙员外】李建勋

朝始一枝开，暮复一枝落。
只恐雨淋漓，又见春萧索。

侵晨结驷携酒徒，寻芳踏尽长安衢。
思量少壮不自乐，他日白头空叹吁。

卷 739_7

【春日病中】李建勋

才得归闲去，还教病卧频。
无由全胜意，终是负青春。
绿柳渐拂地，黄莺如唤人。
方为医者劝，断酒已经旬。

卷 739_8

【殴妓】李建勋

自为专房甚，匆匆有所伤。
当时心已悔，彻夜手犹香。
恨枕堆云髻，啼襟搵月黄。
起来犹忍恶，剪破绣鸳鸯。

卷 739_9

【踏青樽前】李建勋

期君速行乐，不要旋还家。
永日虽无雨，东风自落花。
诗毫粘酒淡，歌袖向人斜。
薄暮忘归路，垂杨噪乱鸦。

卷 739_10

【正月晦日】李建勋

莫倦寻春去，都无百日游。
更堪正月过，已是一分休。
泉暖声才出，云寒势未收。
晚来重作雪，翻为杏花愁。

卷 739_11

【惜花】李建勋

白发今如此，红芳莫更催。
预愁多日谢，翻怕十分开。
点滴无时雨，荒凉满地苔。
闲阶一杯酒，惟待故人来。

卷 739_12

【金谷园落花】李建勋

愁见清明后，纷纷盖地红。
惜看难过日，自落不因风。
蝶散馀香在，莺啼半树空。
堪悲一尊酒，从此似西东。



卷 739_13

【柳花寄宋明府】李建勋

每爱江城里，青春向尽时。
一回新雨歇，是处好风吹。
破石黏虫网，高楼扑酒旗。
遥知陶令宅，五树正离披。

卷 739_14

【送人】李建勋

相见未逾月，堪悲远别离。
非君谁顾我，万里又南之。
雨逼清明日，花阴杜宇时。
愁看挂帆处，鸥鸟共迟迟。

卷 739_15

【闲游】李建勋

携酒复携觞，朝朝一似忙。
马谙频到路，僧借旧眠床。
道胜他图薄，身闲白日长。
扁舟动归思，高处见沧浪。

卷 739_16

【柏梁隔句韵诗】李建勋

不喜长亭柳，枝枝拟送君。
惟怜北窗口，树树解留人。
圆缺都如月，东西只似云。
愁看离席散，归盖动行尘。



卷 739_17

【赠赵学士】李建勋

常钦赵夫子，远作五侯宾。
见面到今日，操心如古人。
醉同华席少，吟访野僧频。
寂寂长河畔，荒斋与庙邻。

卷 739_18

【春阴】李建勋

老雨不肯休，东风势还作。
未放草蒙茸，已遣花萧索。
浮生何苦劳，触事妨行乐。
寄语达生人，须知酒胜药。

卷 739_19

【春日金谷园】李建勋

火急召亲宾，欢游莫厌频。
日长徒似岁，花过即非春。
晚雨来何定，东风自不匀。
须知三个月，不是负芳晨。

卷 739_20

【夏日酬祥松二公见访】李建勋

多谢空门客，时时出草堂。
从容非有约，淡薄不相忘。
池映春篁老，檐垂夏果香。
西峰正清霁，自与拂吟床。

卷 739_21

【怀赠操禅师】李建勋

尝忆曹溪子，龕居面碧嵩。
杉松新夏后，雨雹夜禅中。
道匪因经悟，心能向物空。
秋来得音信，又在剡山东。

卷 739_22

【闲居秋思呈祥松二公】李建勋

秋光虽即好，客思转悠哉。
去国身将老，流年雁又来。
叶红堆晚径，菊冷藉空罍。
不得师相访，难将道自开。

卷 739_23

【赋得冬日青溪草堂四十字】李建勋

莫道无幽致，常来到日西。
地虽当北阙，天与设东溪。
疏苇寒多折，惊凫去不齐。
坐中皆作者，长爱觅分题。

卷 739_24

【溪斋】李建勋

水木绕吾庐，褰帘晚槛虚。
衰条寒露鹊，幽果落惊鱼。
爱酒贫还甚，趋时老更疏。
乖慵自有素，不是忽簪裾。

卷 739_25

【留题爱敬寺】李建勋

野性竟未改，何以居朝廷。
空为百官首，但爱千峰青。



南风新雨后，与客携觞行。
斜阳惜归去，万壑啼鸟声。

卷 739_26

【小园】李建勋

小园吾所好，栽植忘劳形。
晚果经秋赤，寒蔬近社青。
竹萝荒引蔓，土井浅生萍。
更欲从人劝，凭高置草亭。

卷 739_27

【宿山房】李建勋

石窗灯欲尽，松槛月还明。
就枕浑无睡，披衣却出行。
岩高泉乱滴，林动鸟时惊。
倏忽山钟曙，喧喧仆马声。

卷 739_28

【金陵所居青溪草堂闲兴】李建勋

窗外皆连水，杉松欲作林。
自怜趋竞地，独有爱闲心。
素壁题看遍，危冠醉不簪。
江僧暮相访，帘卷见秋岑。

卷 739_29

【阙下偶书寄孙员外】李建勋

长安驱驰地，贵贱共悠悠。
白日谁相促，劳生自不休。
凤翔双阙晓，蝉噪六街秋。
独有南宫客，时来话钓舟。

卷 739_30

【寄魏郎中】李建勋

碌碌但随群，蒿兰任不分。
未尝矜有道，求遇向吾君。
逸驾秋寻寺，长歌醉望云。
高斋纸屏古，尘暗北山文。

卷 739_31

【病中书怀寄王二十六】李建勋

落叶满山州，闲眠病未瘳。
窗阴连竹枕，药气染茶瓯。
路匪人遮去，官须自觅休。
焉宜更羸老，扶杖作公侯。



卷 739_32

【采菊】李建勋

簇簇竞相鲜，一枝开几番。
味甘资麴蘖，香好胜兰荪。
古道风摇远，荒篱露压繁。
盈筐时采得，服饵近知门。

卷 739_33

【送王郎中之官吉水】李建勋

南望庐陵郡，山连五岭长。
吾君怜远俗，从事辍名郎。
移户多无土，春蚕不满筐。
惟应劳赞画，溪峒况强梁。

卷 739_34

【孤雁】李建勋

欲食不敢食，合栖犹未栖。
闻风亦惊过，避缴恨飞低。
水阔缘湘困，云寒过碛迷。
悲鸣感人意，不见夜乌啼。

卷 739_35

【赠送致仕郎中】李建勋

鹤立瘦棱棱，髭长白似银。
衣冠皆古制，气貌异常人。
听雪添诗思，看山滞酒巡。
西峰重归路，唯许野僧亲。



卷 739_36

【宿友人山居寄司徒相公】李建勋

雨雪正霏霏，令人不忆归。
地炉僧坐暖，山枿火声肥。
隔纸烘茶蕊，移铛剥芋衣。
主君在霄汉，此兴得还希。
郢客相寻夜，荒庭雪洒篙。
虚堂看向曙，吟坐共忘劳。
溪冻声全减，灯寒焰不高。
他人莫相笑，未易会吾曹。

卷 739_37

【感故府二首】李建勋

戚戚复戚戚，期怀安可释。
百年金石心，中路生死隔。

新坟应草合，旧地空苔色。
白日灯荧荧，凝尘满几席。
悒悒复悒悒，思君安可及。
永日在阶前，披衣随风立。
高楼暮角断，远树寒鸦集。
惆怅几行书，遗踪墨犹湿。

卷 739_38

【田家三首】李建勋

毕岁知无事，兵销复旧叮。
竹门桑径狭，春日稻畦青。
犬吠隈篱落，鸡飞上碓程。
归田起口思，蛙叫草冥冥。
不识城中路，熙熙乐有年。
木槃擎社酒，瓦鼓送神钱。
霜落牛归屋，禾收雀满田。
遥陂过秋水，闲阁钓鱼船。
长爱田家事，时时欲一过。
垣篱皆树槿，厅院亦堆禾。
病果因风落，寒蔬向日多。
遥闻数声笛，牛晚下前坡。

卷 739_39

【新竹】李建勋

裊裊薰风软，娟娟湛露光。
参差仙子仗，迤逦羽林枪。
迥去侵花地，斜来破藓墙。
箨干犹抱翠，粉腻若涂装。
径曲茎难数，阴疏叶未长。
懒嫌吟客倚，甘畏夏虫伤。
映水如争立，当轩自著行。
北亭尊酒兴，还为此君狂。

卷 739_40

【归燕词】李建勋

羽翼势虽微，云霄亦可期。
飞翻自有路，鸿鹄莫相嗤。
待侣临书幌，寻泥傍藻池。
冲人穿柳径，捕蝶绕花枝。
广厦来应遍，深宫去不疑。
雕梁声上下，烟浦影参差。
旧地人潜换，新巢雀漫窥。
双双暮归处，疏雨满江湄。

卷 739_41



【题魏坛二首】李建勋

不遇至真传道要，曾看真诰亦何为。
 旧碑经乱沈荒涧，灵篆因耕出故基。
 蛙黾自喧浇药井，牛羊闲过放生池。
 萧条夕景空坛畔，朽桧枝斜绿蔓垂。
 一寻遗迹到仙乡，云鹤沈沈思渺茫。
 丹井岁深生草木，芝田春废卧牛羊。
 雨淋残画摧荒壁，鼠引饥蛇落坏梁。
 薄暮欲归仍伫立，菖蒲风起水泱泱。

卷 739_42**【东楼看雪】李建勋**

一上高楼醉复醒，日西江雪更冥冥。
 化风吹火全无气，平望惟松少露青。
 腊内不妨南地少，夜长应得小窗听。
 因思旧隐匡庐日，闲看杉桧掩石扃。

卷 739_43**【落花】李建勋**

惜花无计又花残，独绕芳丛不忍看。
 暖艳动随莺翅落，冷香愁杂燕泥干。
 绿珠倚槛魂初散，巫峡归云梦又阑。
 忍把一尊重命乐，送春招客亦何欢。

卷 739_44**【春雪】李建勋**

南国春寒朔气回，霏霏还阻百花开。
 全移暖律何方去，似误新莺昨日来。
 平野旋销难蔽草，远林高缀却遮梅。
 不知金勒谁家子，只待晴明赏帝台。

卷 739_45**【重戏和春雪寄沈员外】李建勋**

谁道江南要雪难，半春犹得倚楼看。
 却遮迟日偷莺暖，密洒西风借鹤寒。
 散漫不容梨艳去，轻明应笑玉华干。
 和来琼什虽无敌，且是依家比兴残。

卷 739_46**【春日尊前示从事】李建勋**

州中案牍鱼鳞密，界上军书竹节稠。
 眼底好花浑似雪，瓮头春酒漫如油。
 东君不为留迟日，清镜唯知促白头。
 最觉此春无气味，不如庭草解忘忧。

卷 739_47

【尊前】李建勋

官为将相复何求，世路多端早合休。
 渐老更知春可惜，正欢唯怕客难留。
 雨催草色还依旧，晴放花枝始自由。
 莫厌百壶相劝倒，免教无事结闲愁。

卷 739_48

【蔷薇二首】李建勋

万蕊争开照槛光，诗家何物可相方。
 锦江风撼云霞碎，仙子衣飘黼黻香。
 裊露早英浓压架，背人狂蔓暗穿墙。
 彩笺蛮榼旬休日，欲召亲宾看一常。
 拂檐拖地对前墀，蝶影蜂声烂熳时。
 万倍馨香胜玉蕊，一生颜色笑西施。
 忘归醉客临高架，恃宠佳人索好枝。
 将并舞腰谁得及，惹衣伤手尽从伊。

卷 739_49

【残牡丹】李建勋

肠断题诗如执别，芳茵愁更绕阑铺。
 风飘金蕊看全落，露滴檀英又暂苏。
 失意婕妤妆渐薄，背身妃子病难扶。
 回看池馆春休也，又是迢迢看画图。

卷 739_50

【春雨二首】李建勋

春霖未免妨游赏，唯到诗家自有情。
 花径不通新草合，兰舟初动曲池平。
 净缘高树莓苔色，饥集虚廊燕雀声。
 闲忆昔年为客处，闷留山馆阻行行。
 萧萧春雨密还疏，景象三时固不如。
 寒入远林莺翅重，暖抽新麦土膏虚。
 细蒙台榭微兼日，潜涨涟漪欲动鱼。
 唯称乖慵多睡者，掩门中酒览闲书。

卷 739_51

【醉中惜花更书与诸从事】李建勋

公退寻芳已是迟，莫因他事更来希。
 未经旬日唯忧落，算有开时不合归。
 歌榭宴馀风裊裊，闲园吟散雨霏霏。
 高楼鼓绝重门闭，长为抛回恨解衣。

卷 739_52

【和判官喜雨】李建勋

去祷山川尚未还，云雷寻作远声寒。
人情便似秋登悦，天色休劳夜起看。
高槛气浓藏柳郭，小庭流拥没花坛。
须知太守重墙内，心极农夫望处欢。

卷 739_53

【离阙下日感恩】李建勋

二年尘冒处中台，喜得南归退不才。
即路敢期皇子送，出关犹有御书来。
未知天地恩何报，翻对江山思莫开。
斜日苇汀凝立处，远波微飏翠如苔。

卷 739_54

【细雨遥怀故人】李建勋

江云未散东风暖，溟蒙正在高楼见。
细柳缘堤少过人，平芜隔水时飞燕。
我有近诗谁与和，忆君狂醉愁难破。
昨夜南窗不得眠，闲阶点滴回灯坐。

卷 739_55

【春水】李建勋

万派争流雨过时，晚来春静更逶迤。
轻鸥散绕夫差国，远树微分夏禹祠。
青岸渐平濡柳带，旧溪应暖负莼丝。
风鬟倚楫谁家子，愁看鸳鸯望所之。

卷 739_56

【蝶】李建勋

粉蝶翩翩若有期，南园长是到春归。
闲依柳带参差起，困傍桃花独自飞。
潜被燕惊还散乱，偶因人逐入帘帏。
晚来欲雨东风急，回看池塘影渐希。

卷 739_57

【中春写怀寄沈彬员外】李建勋

省从骑竹学讴吟，便殢光阴役此心。
寓目不能闲一日，闭门长胜得千金。
窗悬夜雨残灯在，庭掩春风落絮深。
唯有故人同此兴，近来何事懒相寻。

卷 739_58

【钟山寺避暑勉二三子】李建勋

楼台虽少景何深，满地青苔胜布金。

松影晚留僧共坐，水声闲与客同寻。
清凉会拟归莲社，沈湎终须弃竹林。
长爱寄吟经案上，石窗秋霁向千岑。

卷 739_59

【道林寺】李建勋

虽向钟峰数寺连，就中奇胜出其间。
不教幽树妨闲地，别著高窗向远山。
莲沼水从双涧入，客堂僧自九华还。
无因得结香灯社，空向王门玷玉班。

卷 739_60

【和致仕沈郎中】李建勋

欲谋休退尚因循，且向东溪种白蘋。
谬应星辰居四辅，终期冠褐作闲人。
城中隔日趋朝懒，楚外千峰入梦频。
残照晚庭沈醉醒，静吟斜倚老松身。

卷 739_61

【醉中咏梅花】李建勋

十月清霜尚未寒，雪英重叠已如抔。
还悲独咏东园里，老作南州刺史看。
北客见皆惊节气，郡僚痴欲望杯盘。
交亲罕至长安远，一醉如泥岂自欢。

卷 739_62

【闲出书怀】李建勋

闲游何用问东西，寓兴皆非有所期。
断酒只携僧共去，看山从听马行迟。
溪田雨涨禾生耳，原野莺啼黍熟时。
应有交亲长笑我，独轻人事鬓将衰。

卷 739_63

【寺居陆处士相访，感怀却寄二三友人】李建勋

湘寺闲居亦半年，就中昨夜好潸然。
人归远岫疏钟后，雪打高杉古屋前。
投足正逢他国乱，冥心未解祖师禅。
炉烟向冷孤灯下，唯有寒吟到曙天。

卷 739_64

【春雪】李建勋

随风竟日势漫漫，特地繁于故岁看。
幽榭冻黏花屋重，短檐斜湿燕巢寒。
闲听不寐诗魂爽，净吃无厌酒肺干。

莫道便为桑麦药，亦胜焦涸到春残。

卷 739_65

【惜花】李建勋

淡淡西园日又垂，一尊何忍负芳枝。
莫言风雨长相促，直是清明得几时。
心破只愁莺践落，眼穿唯怕客来迟。
年年使我成狂叟，肠断红笺几首诗。

卷 739_66

【梅花寄所亲】李建勋

一气才新物未知，每惭青律与先吹。
雪霜迷素犹嫌早，桃杏虽红且后时。
云鬓自黏飘处粉，玉鞭谁指出墙枝。
老夫多病无风味，只向尊前咏旧诗。

卷 739_67

【登升元阁】李建勋

登高始觉太虚宽，白雪须知唱和难。
云渡琐窗金榜湿，月移珠箔水精寒。
九天星象帘前见，六代城池直下观。
唯有上层人未到，金乌飞过拂阑干。

卷 739_68

【雪有作】李建勋

霏霏奕奕满寒空，况是难逢值腊中。
未白已堪张宴会，渐繁偏好去帘栊。
庭莎易集看盈地，池柳难装旋逐风。
长爱清华入诗句，预愁迟日放消融。

卷 739_69

【宫词】李建勋

自远凝旒守上阳，舞衣顿减旧朝香。
帘垂粉阁春将尽，门掩梨花日渐长。
草色深浓封辇路，水声低咽转宫墙。
君王一去不回驾，皓齿青蛾空断肠。

卷 739_70

【晚春送牡丹】李建勋

携觞邀客绕朱阑，肠断残春送牡丹。
风雨数来留不得，离披将谢忍重看。
氛氲兰麝香初减，零落云霞色渐干。
借问少年能几许，不许推酒厌杯盘。

卷 739_71

【岁暮晚泊，望庐山不见，因怀岳僧呈察判】李建勋

贪程只为看庐阜，及到停舟恨颇浓。
云暗半空藏万仞，雪迷双瀑在中峰。
林端莫辨曾游路，鸟际微闻向暮钟。
长愧昔年招我入，共寻香社见芙蓉。

卷 739_72

【重台莲】李建勋

斜倚秋风绝比伦，千英和露染难匀。
自为祥瑞生南国，谁把丹青寄北人。
明月几宵同绿水，牡丹无路出红尘。
怜伊不算多时立，赢得馨香暗上身。

卷 739_73

【迎神】李建勋

摐蛮鼙，吟塞笛，女巫结束分行立。
空中再拜神且来，满奠椒浆齐献揖。
阴风窸窣吹纸钱，妖巫瞑目传神言。
与君降福为丰年，莫教赛祀亏常筵。

卷 739_74

【春词】李建勋

日高闲步下堂阶，细草春莎没绣鞋。
折得玫瑰花一朵，凭君簪向凤凰钗。

卷 739_75

【独夜作】李建勋

佳人一去无消息，梦觉香残愁复入。
空庭悄悄月如霜，独倚阑干伴花立。

卷 739_76

【竹】李建勋

琼节高吹宿凤枝，风流交我立忘归。
最怜瑟瑟斜阳下，花影相和满客衣。

卷 739_77

【清明日】李建勋

他皆携酒寻芳去，我独关门好静眠。
唯有杨花似相觅，因风时复到床前。

卷 739_78

【宫词】李建勋

宫门长闭舞衣闲，略识君王鬓便斑。
却羡落花春不管，御沟流得到人间。

卷 739_79

【送喻炼师归茅山】李建勋

休粮知几载，脸色似桃红。
半醉离城去，单衣行雪中。
水声茅洞晓，云影石房空。
莫学秦时客，音书便不通。

卷 739_80

【和元宗元日大雪登楼】李建勋

纷纷忽降当元会，著物轻明似月华。
狂洒玉墀初散絮，密黏宫树未妨花。
迴封双阙千寻峭，冷压南山万仞斜。
宁意传来中使出，御题先赐老僧家。

卷 739_81

【游栖霞寺】李建勋

养花天气近平分，瘦马来敲白下门。
晓色未开山意远，春容犹淡月华昏。
琅琊冷落存遗迹，篱舍稀疏带旧村。
此地几经人聚散，只今王谢独名存。

卷 739_82

【答汤悦】李建勋

司空犹不作，那敢作司徒。
幸有山翁号，如何不见呼。

卷 739_83

【金山】李建勋

不嗟白发曾游此，不叹征帆无了期。
尽日凭阑谁会我，只悲不见韩垂诗。

卷 739_84

【送李冠（冠善吹中管）】李建勋

匀如春涧长流水，怨似秋枝欲断蝉。
可惜人间容易听，清声不到御楼前。

卷 739_85

【游宋兴寺东岩】李建勋

几年不到东岩下，旧住僧亡屋亦无。
寒日萧条何物在，朽松经烧石池枯。

卷 739_86

【批周宗书后】李建勋

偶罢阿衡来典郡，固无闲物可应官。
凭君为报群胥道，莫作循州刺史看。

卷 739_87

【题信果观壁】李建勋

春来涨水流而活，晓色西山势似行。
玉洞主人经劫在，携竿步步就长生。

卷 739_88

【送八分书与友人，继以诗】李建勋

跢跢为诗跢跢书，不封将去寄仙都。
仙翁拍手应相笑，得似秦朝次仲无。

卷 739_89

【句】李建勋

桃花流水须长信，不学刘郎去又来。
（见《南唐近事》）
粟多未必全为计，师老须防有伏兵。
（《寄冯延鲁使闽》）
遍寻云壑重题石，欲下山门更倚松。
（《留别钟山》，见《吟窗杂录》）